

欽  
定  
全  
唐  
文

欽定全唐文卷五十五目錄

德宗 六

春令大赦文

南郊赦文

南郊赦文

讓皇太子表

大乘理趣六波羅密多經序

刑政箴 并序

君臣箴

宸扈台衡二銘 并序

贈太尉段秀實紀功碑

西平王李晟東渭橋紀功碑

闕西川節度大使檢校司徒兼中書令上柱國南

康郡王韋臯紀功碑銘 并序

順宗

授韋執誼尚書左丞平章事制

授杜佑諸道鹽鐵等使制

授撫王紘河東節度使制

封皇太子大男寧平原郡王等制

授范希朝神策軍節度使制

授杜黃裳門下侍郎袁滋中書侍郎並平章事制

罷鄭珣瑜高郢平章事制

封欽王等詔

放免積欠詔

命皇太子攝位詔

遺詔

崇陵優勞德音

冊廣陵郡王爲皇太子文

皇太子即位冊文

即位赦文

欽定全唐文卷五十五

德宗 六

春令大赦文

朕以菲薄託於王公之上恭承天地之序虔奉祖宗之訓  
遐想至理思臻太和而誠不感物化不柔遠聲教猶鬱征  
賦仍繁頃者務於安人不憚屈己與西蕃結好申以齊盟  
而戎心無厭背義虧信劫脅士庶屢犯封疆元元何辜皆  
朕之失乃者輦轂之下凶徒結構上帝垂祐悉自伏誅刑  
以止殺諒非獲已今三陽布和萬物資始思與羣公兆庶

惟新政理宜敷在宥之澤以覃作解之恩可大赦天下大辟罪已下繫囚見徒常赦所不原者咸赦除之官吏犯贓不在免限流人配隸放還左降官量移近處已經量移者更與量移百姓逋欠一切放免諸州遭水旱委長吏貸種子天下兩稅更審定等第仍加三年一定以爲永式涇隴邠寧振武靈鹽夏銀官健常例之外每年加賜兩段軍州官吏寄客能務農業入粟助邊量其多少酬以官秩天下刺史與一子正員官戶口增加田疇廣闊者長吏加一階縣令減選優與處分額內官勿更注擬見任者三考勒停

各官食錢所欲別置本宜令中書門下與百僚議可否奏  
京九品已上官各上封事極言得失賢良方正直諫者高  
蹈不仕隱居巖穴孝弟力田聞於鄉里所在長官具名聞  
薦諸色官有清白政術堪任刺史縣令者常參官各舉所  
知朕當親自策試之諸軍立仗將士共賜物一萬匹陪位  
蕃客賜一千匹

南郊赦文

禮稱日至而郊詩美豐年之報然則迎日之始時莫大焉  
順成之祐慶莫重焉朕承天眷懷俾作神主朝夕砥礪日



月永思惟人安化洽是勤惟歲稔時和是冀上靈降鑒豐  
祉聿臻展禮郊丘申大報之義祇禋宗廟極追孝之誠四  
海具瞻百神咸秩古者凡有大澤必與天下樂之慶賜遂  
行無思不備内外文武及致仕官並諸將士等三品已上  
賜爵一級四品已下加一階宰相及東都留守六軍統軍  
諸道節度神策神威金吾六軍及都團練防禦觀察使京  
兆河南尹正員尚書御史臺長官太常卿各與一子官大  
禮行事官各加一階立仗將士及守本營者共賜物十八  
萬端匹故尚父子儀與一子五品正員官如已五品已上

量與改轉贈太尉秀實與一子官張巡許遠南霽雲顏真卿顏杲卿各與一子正員官天下見禁囚徒罪至流死者各遞減一等徒罪已下一切放免左降官經三考流人配隸効力之類經三周年者普與量移近日州縣官吏專殺立威杖或踰制自今已後有責情決罰致死者宜令本道觀察使具事繇聞奏並申報刑部御史臺吐蕃比虧信約自絕通和邊鎮之間事資備禦因其犯邊累獻俘囚旣切懷歸之心復加幽繫之苦永言覆育豈閒華夷應所獲吐蕃生口見在者一切放歸本國仍並遣人送至界首量事

資遣使得自全應諸道自艱難已來戰陣喪歿及荒凶死亡骸骨暴露者長吏各令收瘞奠醑守宰之任弊在數更自今刺史縣令以四考爲限嗚呼朕獲主珪璧十有二年於茲天地明察罔敢不祗一日萬幾罔敢不慎遷已之過庶無吝心致人之安實有明志夫祀之馨香在德天之視聽在人惟命不常聖有謨訓慶感旣集於茲日儆厲方戒於將來冀勉增修聿懷多福凡百有司所宜同之

南郊赦文

朕以寡德祗膺天命勵精理道十有五年夙夜惟寅罔敢

自逸小大之務莫不祇勤皇靈顧懷宗社垂祐年穀豐阜  
荒服會同遠至邇安中外咸若永惟多祜寔荷元休是用  
虔奉禮章躬薦郊廟克展因心之敬獲申報本之誠慶感  
茲深怵惕惟厲可大赦天下自貞元九年十一月十日昧  
爽已前大辟罪咸赦除之左降官及流人並量移近處內  
外文武見任及致仕官並諸軍諸使將士等三品已上賜  
爵一級四品已下加一階將士白身者賜勲兩轉緣大禮  
職掌行軍法駕南郊後留守副守及太倉左藏庫及陪位  
官等三品已上更賜爵一級四品已下加一階其郊壇官

廟行事官仍各賜勲兩轉皇親應陪位者三品已上賜爵一級四品已下加一階及諸色應陪位官等各賜勲兩轉親王大長公主長公主嗣王郡縣主鄮公介公鴻臚蕃客神策神威六軍及諸使應緣大禮宿衛御樓立仗及守本軍本營者諸道節度在京帖仗將士賜物有差宰輔及在方鎮者祖父各與追贈東京留守諸軍節度觀察都防禦都團練經略鹽鐵轉運使左右神策神威六軍等統軍大將軍英武威遠軍使戶部侍郎判度支及京文武三品已上正員官尚書省四品官中書門下省御史臺五品官父

在未有官者量授檢校官已有官者加一階母在未有邑號者授邑號已有邑號者更進邑號父母亡歿者各與追贈應諸軍防秋兵馬使及別勅定名充邊地兵馬使等備禦勤勞所宜優異其父在未有官者各授檢校官母在未有邑號者各授邑號邊軍鎮守及諸道諸軍防秋將士經三週年未改轉者宜與甄敘其九廟配享功臣封爵廢絕者宜令紹封以享祀故尚父子儀太尉秀實宜與一子六品正員官天下有才德高遠爲衆所知及隱遯邱園不求聞達者委所在州府長吏具名迹聞薦諸色人中有賢良

方正能直言極諫或博通墳典達於教化或詳明政術可以理人者委常參官及州府長吏各舉所知聞奏朕當親自策試諸司官有陳時政得失各盡所見條流封進人有冤滯事有闕遺悉當極言無所隱避

讓皇太子表

臣性本凡愚識無久遠夙承訓誨未達禮經俾踐元良是輕主鬯顧惟孱懦何以克堪然臣頃總戎麾恭憑睿略在臣何力妄欲貪天且五帝三王立嗣殊制王者家天下以傳子帝者官天下以傳賢胡有居五帝之時行三王之禮

臣雖不敏竊謂非宜乃知古之正統不以年樹後不以嫡明矣若以臣居嫡而廢德在長而捨賢恐大道淳風隱而不見伏以天下之公器不可虛涉宗廟之宏綱不可輕舉伏惟陛下敦三善之本審萬國之貞不可以私授爲心但可以推賢爲慮則陛下享唐虞之德臣蒙伯邑之名乞回聖慈俯寢恩命

大乘理趣六波羅密多經序

大樸旣散有爲遂作名利牽乎伐巧智喪乎真愛惡攻乎性情因緣堅其染習內則百慮無節外則六根競誘天理



滅而莫知道源迷而忘返淪溺苦海劫盡還初惟至人了  
萬物之宗越三界之表廓獨立而不改徧諸有而常然故  
能開導羣疑濟拔流品六波羅密多經者衆法之津梁度  
門之圓極也昔日月燈明如來爲菩薩說歷劫曠遠真偈  
寂寥文殊師利於耆闍會中嘗與彌勒菩薩語及其事成  
一切種智會無量義因唯佛能知惟佛能說教必有主其  
在茲乎是以釋迦如來爲法而生俟時而現三身不異故  
處代而常離萬行無修故隨方而自在運慈悲之力開攝  
護之門因其六塵示之六度導於法分令證法身結習紛

綸乘理而悟是真般若之旨也故有慈氏善問大音讚言  
天垂寶華雲集仙蓋甘露流液光明燭幽使迷方淺深皆  
得自然之慧恒沙億衆能通般若之知嘗試論之先儒有  
言誠者自成而道自道也夫誠已於內則不勉而中不思  
而得誠物於外則不言而應不爲而成其內者證法之身  
其外者大悲之力德產之致也密化育之功也大春風發  
吹萬類咸滋旭日昇晝羣陰盡釋乾坤易簡之道是則大  
同神明幽贊之情孰云區別殊塗一致其理固然朕虔奉  
丕圖保乂蒸庶思建皇極以外大猷遐想靈蹤期於叶契

而舍城妙說久祕梵文徒懷瀉餅未啟遺夾微言不昧將  
或起予於是屬賓沙門般若受旨宣揚光宅沙門利言爲  
之翻譯時大德則資聖寺道液醴泉寺超悟慈恩寺應真  
莊嚴寺圓照光宅寺道岸西明寺圓照誓空良秀等法門  
領袖人中龍象證明正義輝潤元文知釋迦之寶城識衆  
尊之滿字以貞元四年歲次戊辰十二月二十八日於西  
明寺譯成上進凡一部十卷龍神翼衛如從金口之傳梵  
衆護持無異毫光之現朕齋心滌慮仰味宗源聞所未聞  
實爲希有然以汲引之旨流布爲先庶憑眞詮永濟浮俗

聊因暇日三復斯經雖法海甚深而波流不讓舉其梗槩  
昭悟將來

刑政箴 并序

朕以南面勵精理道雖及和平之濟未臻元古之風夙夜  
孜孜勤求不怠夫安人以正輔政以刑蓋爲之立中非使  
人從欲也是以務兼聽以酌羣情擇庶官以資共理恒勉  
不足而遏其過我欲仁矣尚逮夫意哉然萬務是殷必戒  
其失聽政之暇常志所存聊綴斯文庶乎自儆爾

大樸旣散利欲是生惟辟御時建極作程導以仁政齊以

典刑惠此下人致之和平立政伊何必循道德詳刑伊何必去煩刻不以人從欲不以枉傷直故百度惟貞萬物作式匪陽不生匪陰不成寬則致慢猛亦取怨酌於大猷戒厥偏見罔拂人志罔興人患邇言必察芻蕘必詢奉無私之心以誠其意廣無情之聽思得其真喜怒有節措置有倫是以令肅如秋化行如春無邇儉人無信側言儉人則敗政側言乃惑聽罔攻異端慎乃出令知人不易在觀其行事實求理法乃因時法非生弊聖哲不爲導物類之情以通其變相天地之道咸盡其宜教必明於順動必慮於

違是以天覆之德日用不知六馬並馳在鈞衡策五音並  
奏在理金石苟去回邪可行蠻貊因人而理自古不易唐  
堯赭服夏禹泣辜以弼於理冀遷其愚寧漏吞舟豈求噬  
膚陷之於過是曰毒痛天監孔明無臭無聲罔載而僞必  
先爾誠蟻壤不防太山可傾患生所忽禍起所輕故作事  
謀始而戒於未形予臨兆人道存化育祇荷元貺幸清九  
服闕若履深谷思正其源庶登於樸監於往躅書以自勗

君臣箴

夫惟德惠人惟辟奉天從諫則聖共理惟賢皇立有極駿

命不易總萬機以成務齊六合之殊致一心不能獨鑑一目不能周視敷求哲人式序在位於戲君之任臣必求一德臣之事君咸思正直何啟沃之所宜自古今而未得且以讜言者逆耳讒諛者伺側故下情未通而上聽已惑俾夫忠賢敗於凶慝譬彼輕舟烝徒楫之亦有和羹宰夫膳之孰云理國不自得師覆車之軌予其懲而高以下升和由甘受惟君無良亦臣之咎聞諸辛毗牽裾魏后則有禽息竭忠碎首勉思獻替以平可否勿謂無傷自微而彰勿謂何害積小成大事有隱而必見令旣出而焉悔鼓鐘在

宮聲聞於外浩然涉水朕未有艾將負宸以虛心期盡忠而納誨在昔稷契實匡舜禹近茲魏徵佑我文祖君臣協德混一區宇肆予寡昧獲纘丕緒臣哉隣哉爾翼爾輔高秋始肅我武維揚輟此禁衛殿於大邦戀闕方甚嘉言乃昌是規是諫金玉其相辭高理要入德知方總彼千慮備於八章宣父有言起予者商殷有盤銘周有欽器或誠以辭或警以事披圖演義發於爾志與金鏡而高懸將座右而同置人皆有初鮮愼厥終汝其夙夜期保朕躬無曰爾身在外而爾誠不通一言之應千里攸同導彼遐俗達予



四聰華夷仰德時乃之功既往既來懷賢忡忡唱予和汝  
式示深衷

宸宸台衡二銘

并序

朕每覽上古之書及唐虞之際君臣相得聖賢同時日夕  
孜孜講論治道或陳其鑒誠諷以歌詠煥乎典謨百代是  
式有以見啟沃之道理化之端意甚慕之而未能逮也頃  
靈鹽節度使杜希全著書上獻多所規諫聊爲君臣箴用  
答其意河東等道副元帥司徒燧固請勒石貽厥後人朕  
以文旣非工義又未備垂諸後裔良所慙焉起予者商因

之有作庶乎朝夕自儆且俾後代知我文武殿邦之臣歟

### 宸宸銘

天生蒸人性命元淳嗜欲交馳利害糾紛無主乃亂樹之  
以君九域茫茫萬情紜紜目不備覩耳不備聞覩之聞之  
矧又非真事失其源道遠莫親理得其要化行如神失源  
維何不自正身正身之方先誠其意罔縱爾欲罔載爾僞  
體道崇德本仁率義必信若寒暑無私象天地感而遂通  
百慮一致任人之術各當其器捨短從長理無求備事多  
總集衆才咸遂知而必任任而勿貳以天下之目爲鑒我

鑒斯明以天下之心爲謀我謀則智求賢惟廣辦理惟精  
逆耳拂心必嘉乃誠順旨苟容亦察其情斥去奸諛全固  
忠貞先人立言爲代作程諤諤者昌唯唯者傾繫以興亡  
曷云其輕承天子人夫豈不貴伊昔哲王夙夜祇畏馭朽  
爲戒納隍爲志神將害盈天匪假易四海爲家夫豈不富  
伊昔哲王勤儉固陋土階罔飾露臺罷構遠奇技淫巧放  
珍禽異獸敬之慎之天其永佑欲令必行順人之情欲誠  
必著清己之慮心無億詐事必忠恕凡將有爲靡不三思  
喜怒以節動靜以時毫釐或差禍福亦隨慢易厥初悔其

曷追刑不可長武不可恃作威逞勢厲階斯起垂旒蔽明  
黻纁塞耳含宏光大是以爲美覆之如天愛之如子仁心  
感人率土自理嗟予寡昧嗣守丕圖寇戎薦興德化未孚  
大業兢兢其敢以渝俯察物情仰稽典謨作戒斯言寘於  
坐隅

台衡銘

天列台星垂象於人聖人則天亦建輔臣以翼以弼爲衡  
爲鈞如耳目應心如股肱運身是則同體孰云非親陰陽  
相推四序成歲君臣相得萬邦作乂感同風雲合若符契

以道匡救盡規獻替木必從繩金其作礪帝者之盛時維  
陶唐乃聞疇咨側陋明揚洎乎有虞二八騰芳爰迨伊尹  
相於成湯載生姜牙涼彼武王道無不行謀無不臧君聖  
臣賢運泰時康漢高旣興蕭曹亦彰烈烈我祖應期而昌  
剗滅羣凶砥平四方維衛及英啟闢封疆曰房與杜振理  
維綱亦有魏徵忠謇昂昂偉茲衆材爲國棟梁蕩蕩巍巍  
邦家有光是知道之興廢係於時主主之得失資於台輔  
經之以文緯之以武出爲方召入爲申甫絕維載張闕袞  
斯補惟德是依惟才是求人不易知德亦難周傳說版築

夷吾射鉤任之不疑千載垂休體於至公何鄙何讎追維  
哲王必賴良弼矧予不德昧於理術師旅繁起政刑多失  
遘茲艱屯夙夜祇慄翊我戴我實維勲賢內熙庶績外繼  
十連威武載揚謀猷日宣長城壓境巨艦濟川同心同德  
持危扶顛予嘉爾誠爾相予理惟后失道亦臣之恥自昔  
格言慎終如始功藏鼎彝道冠圖史無俾伊傅克專厥美  
作鑒勒銘永世是紀

贈太尉段秀實紀功碑

立人之道曰君與臣爲臣之義曰忠與節忠莫極於衛國

節莫大於忘身存其誠德貫乎天地致其功用施於社稷  
獨斷剿凶慝之命沈謀安宇宙之危其智勇足以拯時其  
義烈足以宏教非昊穹錫慶數佑皇家重振紀綱再激汙  
俗何遘迍之會而獲見斯人開府儀同三司檢校禮部尚  
書兼司農卿上柱國張掖郡王段氏名秀實字成公應期  
降生扶翼唐祚稟陰陽之粹氣備剛柔之全德體正明道  
從時卷舒蓄爲淳和發爲功烈朕宅帝位之五載孟冬十  
月賊臣朱泚反天悖人因時多虞乘我無備誘聚叛卒作  
亂於京師朕深惟罪己之誠遠遵避狄之義駕自中禁狩

於近垌賊陰謀爲奸陽言示順以公嘗任涇帥素得士心  
採諸衆情引以自助公感時悲憤思定大業謂復國安人  
由己不可以顧私謂開物變化在權不可以虛死略匹夫  
之褊介蘊曠代之宏規內貞其心外混其跡且探察元惡  
情狀將因而圖之賊果不疑委以心腹遽發凶黨謀襲我  
師公詭說以詞止之不可乃竊取官印假爲兵符急追寇  
軍不遠而復銷禍紓難陰陽若神於時物情危疑忠邪莫  
判卒乘未輯軍旅未完微公之謀吾幾蔑濟旣而密結勇  
敢誓殲寇讎決策剋期中外發應會賊泚召公計事引入



閤中露其姦情言及僭竊公氣填胃臆植髮衝冠仰天大呼元鑒何昧孰爲臣子而忍是心語未絕音奮笏前擊凶徒敗面旣躓而奔左右愕然初未敢動繼者不至事遂無成逆徒交鋒因而遇害嗟乎天生萬物惟人最靈稟元氣之精鍾五行之秀是宜守正居順移孝資忠君君臣臣父子子各履於達道同臻於太和天乎不融生彼狂悖神乎不惠喪我忠貞靜言思之輟饋忘寐詳求其理抑有以焉茲朕不明敗德招損故列聖垂祐儆戒於予則泚之亂所以懲旣往勗將來禮教陵夷風俗訛弊故上帝元鑒聳

動於人則段公之死所以勵當今傳不朽也訪彼前史稽  
諸昔賢全大節者不必成功建大功者或未立節非節不  
可以裨教非功不可以持危義實相須事難並備吉甫以  
文武翼周室宣王中興絳侯以智謀安劉氏文皇紹立茂  
功著矣而節未可稱董卓脅國以擅威伍孚刺之而不畏  
王敦擁衆以稱亂周顗折之而無疑奇節偉矣而功竟不  
就至若屈伸合變進退知機智以遂其謀勇以決其死功  
與時並節與名偕中古已還無公儔比貞烈之至通於神  
明桀驚聞之而動心仇讎感之而不怨死於義而義著忘

其家而家全行路興悲懦夫增氣矧予之慟其可弭忘且人之所愛者身也國之所重者位也公能殺身徇國朕得不以重位報之哉乃詔有司冊贈太尉諡曰忠烈賜實封五百戶莊宅各一所嗣子授三品正員官諸子各授五品正員官表其閭里護其喪葬官立祠宇史載忠勲哀榮之典備矣君臣之義極矣公始以天寶四載奮筆從戎才爲時生官爲才達得司馬戰陣之法參將軍帷幄之籌累典方州更踐臺寺出擁旌節入爲卿士位歷十七歲踰三紀封王列於異姓開府比於台司參職六官食賦百室言不

伐善慮常下人恒持順信之規罔居疑悔之地利刃在手  
投節皆虛貞松有心老而彌勁吞大憖於方寸之內定危  
疑於晷刻之間力可屈而志不可遷身可殺而節不可奪  
所謂有始有卒爲臣之極致者歟日月有期宅兆云畢身  
歿功在凜然如山勒銘傳芳終古不滅以志吾過且旌善  
人銘曰

浩浩上天四序唯均氣或堙鬱過爲災氛否不可終必復  
元亨洗以膏雨播之祥雲濟濟蒸人五常是則時或屯難  
乃生凶慝亂必有定允歸皇極極以茂勲輔之明德勲德

克崇茲惟段公實天降靈寧保朕躬日月蔽虧宇宙昏蒙  
罔然明識獨誓深忠豺狼爲羣狎狎逞志咆哮奔突乘我  
未備公飛尺符橫制醜類變化若神邦家不墜元惡大慙  
誘姦作狂竊器僭名反易天常公獨挺身奮擊暴強烈烈  
英武歿而彌彰義振名教功存社稷贈極上台賞延真食  
省咎祇畏懷賢憫惻刻銘豐碑昭示萬國

西平王李晟東渭橋紀功碑

天有柱以正其傾地有維以紐其絕皇王有輔佐以濟其  
艱難非命厯所歸不得生良弼非君臣相合不能集大勲

非暴亂宏多不足表忠節非奸猾熾焰不克展雄才天與  
事肆會然後臣功著而王業興焉高祖太宗拓跡垂統掃  
乾坤之沴氣拯生靈之塗炭其受命也正其布澤也寬六  
宗丕承克廣前烈雖遇屯否化危成安二百年閒五夷大  
難由內以正宸極者再自外而復都邑者三山嶽降神雲  
龍叶契繼生賢哲保定邦家神龍中諸武擅權基閒王室  
則有若扶陽王彥範等推戴中宗紹復洪業景龍末嬖韋  
窺國瀆紊乾綱則有若徐國公幽求等左右元宗掃除凶  
穢天寶之季盜起幽陵翠華南征潼關不守廣德之際戎

軼邠郊皇興東巡鄠宮罷警則有若尚父子儀等殄殪醜  
逆冊肅宗於岐攘却蕃夷翊代宗於陝建中四祀寇發上  
京暴蔑人神僭稱名器則有若西平王晟等翦滅大憝廓  
清中區惟茲數公異時同德道濟於社稷勲書於鼎彝唐  
之得人於斯爲盛東渭橋抵王城東北四十里而國之廩  
積在焉始晟於此駐孤軍糾羣帥俟時而動一舉成功予  
是用揚其美而紀其功以明事之有因謀之有素也粵若  
菲德嗣膺大寶化乖柔遠明不燭幽淮右賊臣提兵犯順  
憑陵汝服震壓洛師朕憫將吏之受汙哀烝黎之無訴罔

思衛已姑務靖人亟發禁師東征不軌猶慮勝敵之未勇  
乃徵涇師以繼之賊泚畜姦覲隙乘便餌誘貪卒扇結暴  
徒伺其不虞譟聚犯闕朕引咎出次薄犯二畿封豕長蛇  
穴處宮廟磨牙噴毒噬螫害人晟時總偏師遠戍河朔曾  
不俟召聞難駿奔鼓義勇仗順之師吞敗亡稔惡之寇雄  
威勝勢疾若飈馳屬賊帥昏迷恃衆貪亂誘我蝨賊連謀  
內逼朝廷載遷關河長擾豺狼塞路羿澆爭驅人烟絕於  
井邑陰燐交於田野物情大駭盪然靡依晟乃設會軍門  
哭而誓衆國讎不滅無以身爲遂發感激嗚咽流涕天地



爲之變色將帥爲之動心軍中較然知有逆順晟乃度公  
積計私課程賞典定刑章行令自身錄功先下由是勇者  
奮力智者効謀其氣增倍其心如一屹立堅壁於渭之陽  
姦逆畏威而震懼忠義奮氣而聳慕分二凶之勢不敢相  
附爲諸鎮之援俾得自堅晟之力也二月守暨乎夏五月  
晟知衆心可用乃揀日饗士乙未陳師於東郊如虎如貔  
如熊如羆凶徒接戰累合皆北倒戈棄甲罔敵我師乘而  
殪之摩壘而止戊戌方旭連營進攻賊衆相驚股戰魄駭  
登陣而不敢拒闔門而不敢窺晟仗鉞啟行執桴親鼓斂

隍塹排牆垣勝氣兆於風雲威聲振於原野指顧摧靡盪  
無子遺布朝旨以寬脅從勵臣節以誅同惡乾軸傾而復  
紐皇維弛而更張遷臬聲爲好音變祲祲爲和氣然後閑  
戎律釐軍容不誼不嘩有嚴有翼搜苑囿殄遺寇清宮門  
授彼有司宣言於衆曰恭行天討將以遏亂略去久害王  
師所至歌舞從之其或矜勇恃勲作威肆掠是則以暴易  
暴夫何賴焉懋功有恒賞違禁有常罰惟國之令典不得  
以贖論敢犯令者殺之無捨爰擇便地引軍出屯馬無錯  
羣士必成列剋敵彌日都人莫知徐命有地之官同諭鄜

里士庶聞巨猾之殲殄而我師闕壺觴犒軍如恐不及者

若赤子之保慈母涸鱗之赴洪波或欣而呼或感而泣吾

是以知烈祖積德人懷其深賢臣佐時功濟斯美晟有興

運之略有匪躬之誠有定亂之勲有禁暴之德俾予從乂

垂拱仰成乃冊拜司徒兼中書令加實封一千戶錄功第

一序位居首事業編乎史冊德輝流乎頌聲入爲夔龍出

作方召贊贊徽烈中外具瞻而晟居高牧卑辭滿守約崇

讓而勲閎彌耀惡盈而福祿攸歸斯又明哲之規慎終如

始者也夫制敵在謀不在衆感人以義不以威當天地屯

蒙邦家離析援孤者踣黨勝者強羣心囂囂靡所止戾若  
風動中野波騰滄溟從而拯之豈易爲力於時馬不滿百  
駟兵不盈萬人無郡邑土田之資無城池險阻之固獨立  
不懼氣吞羣凶以盡忠誓心以必死勵己以大順率衆以  
至誠動天衆心攸同天意允答故措軍散地而不可拔致  
討勅寇而力有餘國危能安軍勝能整古所謂衛社稷者  
晟其當之播揚休風篆刻貞石俾厥後嗣無忘乃功銘曰  
赫矣我唐受天眷命祖功宗德浸澤儲慶窮海請吏遐荒  
稟令寧一九服惠康萬姓三五以還莫之與盛迨予不類

辱守丕圖燭理匪時立誠未孚蠢爾孽臣扇茲潰徒震驚  
朕師黷穢皇都宇宙沸騰人神睢盱重以統戎誘姦同貫  
播遷斯載歲聿云半未旣悔禍人胥厭亂乃錫元臣夷凶  
翦叛昏稷茫茫橫流湯湯挺然孤軍在渭之陽我城非完  
恃順爲防我旅非衆同心爲強由義率人人皆嚮方萬事  
如一爭先啟行拗憤求逞蓄威斯張力足勢全時惟鷹揚  
以戰則克以謀則臧指麾之間羣醜潛亡鯨鯢旣平宮室  
旣清軍伍無聲都人不驚成功禁暴自昔稀有實天生德  
彰於厥後洋洋令名茲爲不朽

闕 西川節度大使檢校司徒兼中書令上柱國南

康郡王韋臯紀功碑銘

并序

闕 以陰陽 闕 忠賢作弼宣翼贊之力用能致 闕 則孰 闕 柔

之略致恢復之勲者焉 闕 祖太宗受 闕 握乾符以垂統廓

宇宙而貞觀盛德被於 闕 宗重光克 闕 庭禦大災清大難

佐 闕 閒生才賢斯實我 闕 垂佑 闕 謀猷仗忠義之臣以 闕

鎮乃命左金吾大將軍韋 闕 而有謀 闕 集 闕 其鎮撫之宜

至則宣 闕 朝旨揚國威仁義服 闕 足弁纖 闕 之 闕 人知國

家有安撫之 闕 矣雲南昔在漢爲西域郡 闕 龍 闕 大定區

夏闕來朝獻開元中詔以蒙闕爲雲南王天寶舊州將軍

善能闕西川其孫闕歸內附朕嘉其誠節懿闕時值搶攘

而心不變易乃闕爲司空而九土以平契闕五教以敷蕭

何漕運不乏而闕籌帷幄闕朕深惟德化之未遠風闕憫

此元元以圖無疆之休闕於闕以一旅之師闕一闕之闕

徒外牧黎庶一時闕然闕謹財賦以豐其用故得闕愆來

遠人之貢賦闕言前事符響應闕雲南闕以致遐邇尊王

之闕爲純臣輸琛委贄稽顙闕德以闕則闕代之賢忠良

之佐闕豈虛也哉昔秦漢或闕面非闕謂闕皐一心奉國

百闕義之忱集邦家之闕能制闕復王闕建闕言而理此

臯之忠勲斯闕檢校司徒兼中闕等使宜闕書蓋詳諸家

謀矣茲所闕茂勲紀威績刻闕臣其詞曰闕鴻烈尊主以

忠持危以節闕時之傑我有闕惟闕遐闕及此小康實扶

忠賢撫綏闕吾事惟臣闕西闕惟一闕前聞異時同致保

族承家闕苟能建績功曰不朽闕忠之闕文武之全才道

闕實維時傑純誠闕於闕宜刻金石用表忠勲闕股肱闕

念忠賢存於夢寐闕諒當體予闕

順宗皇帝



帝諱誦德宗長子上元二年生始封宣城郡王大曆十四年六月進封宣王十二月立爲皇太子貞元二十一年正月即位七月以疾令皇太子監國八月傳位皇太子元和元年正月上尊號曰應乾聖壽太上皇是月崩年四十六諡曰至德大聖大安孝皇帝廟號順宗大中三年加諡至德宏道大聖大安孝皇帝

授韋執誼尚書左丞平章事制

宰相之職寅亮緝熙導陰陽之和贊天地之化裁成百揆總領庶官非道契時中識通理本則何以敷暢皇極阜安

羣黎朕以眇身嗣守丕業思立人紀以承天休其代予言  
允屬良弼朝議郎守吏部郎中騎都尉賜緋魚袋韋執誼  
孝友忠肅自誠而明茂實本於宗師英華發於事業久參  
內署動直靜專累踐中臺職修事舉克有公望冠於羣倫  
以予沖人恭默思道是用命爾納誨弼違必能行四方之  
風成天下之務祗服乃職厥惟欽哉可守尚書左丞同中  
書門下平章事賜紫金魚袋

授杜佑諸道鹽鐵等使制

周制國用委於冢卿漢調軍食資於相府必由中以制外

則政一而事行所以阜安兆人平均九賦弼成富庶之教  
馴致雍熙之化實仗元老佐予經邦銀青光祿大夫檢校  
司空同中書門下侍郎平章事充太清宮使上柱國扶風  
郡開國公食邑三千戶杜佑體資易直德合宏大事君以  
道修己以誠寅亮先朝毗贊盛業秉忠直之大節備文武  
之全才保乂朕躬載申啟沃發揮政本開導化源謨明緝  
熙三事允理必能綜領經制變而通之權貨幣之宜成軍  
國之務外均庶土內贍中邦俾予一人恭己而理宏敷五  
典式協於中可檢校司徒充度支及諸道鹽鐵轉運等使

依前同中書門下平章事太清宮使散官餘如故主者施行

授撫王紘河東節度使制

門下肇自周漢至於國朝莫不建立親賢以爲藩衛擇茲賢哲撫鎮北門舉是彝章式協公議撫王紘智量端平體識沈遠毓德早聞於詩禮成器可比於珪璋居然岐嶷之姿雅有信厚之譽是宜獎其令美授以旌旄況全晉雄藩興王故地屏護狄塞統制甲兵撫循繫將領之才居守藉公侯之重一昨師徒擾叛帥令不遵用爾遙臨以綏其衆

爾宜持嚴而務恕約法而推誠戒之慎之載揚丕績可開  
府儀同三司充河東節度觀察處置等使兼太原尹北都  
留守封如故主者施行

封皇太子大男寧平原郡王等制

王者嗣統必上尊祖廟中立人紀下及孫謀所以光贊鴻  
猷發揮大典者也皇太子大男寧等溫敏茂淑依仁游藝  
韶齟之歲自降其心詩書之言夙盈於耳朕初建儲兩永  
固宗祧旣當知子之明彌稱抱孫之慰是用依方建邑籍  
土䟽疆俾奉邦家式崇藩屏本支百代冀邁於周詩子弟

畢封更高於漢室於戲承紫極之慶稟青宮之訓惟師友是敬惟忠孝是憑以樂善爲心好賢爲德古有成範爾其欽哉

授范希朝神策軍節度使制

門下古之命將帥修封疆在於整軍非以耀武故繕理亭障訓齊車徒以申國威以固王略非誠節茂著無以分統六師非勲績彰明無以並護諸將副茲重任實在忠賢特進檢校右僕射右金吾衛大將軍充右街使成紀男范希朝有貞臣之節有良將之風識達武經學綜兵要臨事能

斷好謀而成嘗領元戎鎮於朔野控河上之塞拒漢南之  
庭修其政刑諭以威德士吏向化裔夷綏懷入覲京師策  
勲王府洎司警衛禁旅增嚴直道彌彰嘉庸益茂固可以  
總統北落節制西陲成魏絳和戎之勲振晁錯備邊之策  
俾異俗率化稽人成功師乘以和烽候無警懋建丕績時  
乃之休可開府儀同三司檢校左僕射兼右神策軍京西  
諸城鎮行營兵馬節度使如故

授杜黃裳門下侍郎袁滋中書侍郎並平章事制  
輔弼股肱之臣所與共成天功左右邦理者也朕承至尊

之重居羣后之上夙興寅畏不敢康寧思所以統天人之  
和彰祖宗之烈以行四方之政以遂萬物之宜敷求哲人  
以輔台德銀青光祿大夫守太常卿充禮儀使上柱國鄭  
縣開國公杜黃裳宏深易簡資博厚之德朝議郎檢校左  
散騎常侍兼左金吾大將軍充左街使雲騎尉賜紫金魚  
袋袁滋沖茂精微體誠明之性咸以器業閎茂服在大僚  
祇事先朝克荷休命識達道奧文爲國經固可以儀刑具  
僚參綜庶務寅亮天下毗予一人罔不同心以輔乃辟黃  
裳可門下侍郎平章事滋可中書侍郎平章事



罷鄭珣瑜高郢平章事制

朕承天眷命獲主兆人思致邕熙用康區夏布和緝化屬  
在輔臣所謂適宜實爲通典銀青光祿大夫守吏部尚書  
平章事上柱國鄭珣瑜銀青光祿大夫守刑部尚書平章  
事上柱國高郢等咸以忠靖累更班列秉彝廉慎植操貞  
常自參輔中樞皆能勵節祇勤庶務夙夜惟寅歲月滋深  
嬰纏疾恙袞職有闕無以彌綸況銓綜爲選士之本刑法  
乃生人之命俾從專掌以盡至公宜輟台司副予所委珣  
瑜可吏部尚書郢可刑部尚書

封欽王等詔

王者之制子弟畢封所以固藩輔而重社稷古今之通義也第十弟諤等寬簡忠厚生知孝敬行皆由禮志不違仁樂善本於性情好賢宗於師傅朕承天之序稽古展親宜舉徽章俾開土宇第十弟諤封欽王第十一弟誠封珍王男建康郡王渙封鄴王改名經洋川郡王沔封均王改名緯臨淮郡王洵封淑王改名縱宏農郡王浼封莒王改名紆漢東郡王泳封密王改名綢晉陵郡王湜封郇王改名綜高平郡王淑封邵王改名約雲安郡王滋封宋王改名

結宣城郡王淮封冀王改名綵德陽郡王滑封和王改名  
綺河東郡王浥封福王改名綰洛交郡王況封珍王改名  
繕第十三男絢封衡王十四男纁封會王十七男絃封撫  
王十八男緄封岳王十九男紳封袁王二十男綸封桂王  
二十一男綽封翼王

放免積欠詔

朕君臨寰海子育兆人思欲阜其財求俾遂生殖然後導  
之以禮樂齊之以政刑興廉讓之風洽和平之理而比聞  
官司之內尚有逋懸每念黎蒸用深憂軫永言勤恤宜有

蠲除其莊宅使從興元元年至貞元二十年十月三十日  
已前畿內及諸州府莊宅店鋪車坊園磴零地等所有百  
姓及諸色人應欠租課斛斗見錢純絲草等共五十二萬  
餘並放免朕方與人休息致之富壽物有不得其所事有  
可利於人寤寐求思予無所愛宜加曉示令悉朕懷

命皇太子攝位詔

朕承九聖之烈荷萬邦之重顧以寡德涉道未明虔恭畏  
懼不克祇荷常恐上墜祖宗之訓下貽卿士之憂夙夜祇  
勤如臨淵谷而積疚未復至於經時怡神保和嘗所不暇

永惟四方之大萬物之殷不躬不親慮有曠廢加以山陵  
有日霖潦踰旬是用倣於朕心思答天戒其軍國政事宜  
權令皇太子純勾當百辟羣后中外庶僚悉心輔翼同底  
於理宣布朕意咸所知聞

遺誥

朕聞生死者物之大歸修短者人之常分古先哲王明於  
至道莫不知其終以存義順其變以節哀故存者不至於  
傷生逝者不至於甚痛謂之達理以貫通喪頃在弱齡即  
敦清淨逮於近歲又嬰沈痼嘗亦親政益倦於勤以皇帝

天資仁孝日躋聖敬爰釋重負委之康濟而能內睦於九族外勤於萬幾問寢益嚴視膳無曠推此至德以安庶邦朕之知子無愧天下今厥疾大漸不寤不興付託得人顧復何恨四海兆庶亦奚所哀但聖人大孝存乎善繼樞機之重軍國之殷續而承之不可暫闕以日易月抑惟舊章皇帝宜三日而聽政十三日小祥二十五日大祥二十七日釋服方鎮牧岳不得離任赴哀天下吏人誥至後出臨三日皆釋服無禁嫁娶祠祀飲酒食肉宮中當臨者朝晡各十五舉音非臨時禁無得擅哭釋服之後無禁舉樂他

不載詰中皆以類從事伏以崇陵仙寢復土纔旋甸邑疲  
人休功未幾今又重勞營奉朕所哀矜況漢魏二文皆著  
遺令永言景行常志夙心其山陵制度務從儉約並不得  
金銀錦綵爲飾朕寢疾歲久以至彌留醫藥伎術之人夙  
夜無懈怠其盡瘁頗謂極誠必在優容務令得所百辟卿  
士宣力盡忠克申送往之哀宜展事居之禮布告天下明  
知朕懷

崇陵優勞德音

朕以寡昧嗣膺大業永惟列祖之德肅奉山園之重夕惕

若屬懼有缺遺賴一二元臣公卿庶士叶乃心力克申典禮今九虞既畢永慕惟深爰奉疇勞之義差其異數之命山陵使杜佑若子若孫與一人五品正員官禮儀使杜黃裳特加一階與一子六品官副使李鄴按行山陵地副使李扞賜一級各與一子官鹵簿使鄭雲達與一子出身儀仗使昇梓宮官各賜爵一階邑爵掌優賜有差三京元高陵高陽縣人夫寒凍近道鄰村坊市屋宇什物田苗被毀損並近陵百姓偏有使役委京兆府勘覆聞奏挽郎挽士量加優恤旬內百姓奉山陵秋冬滯雨供應疲弊所配折



金史卷之三  
納和糴並停

冊廣陵郡王爲皇太子文

維貞元二十一年歲次乙酉四月庚子朔九日戊申皇帝  
若曰建儲貳者必歸於上嗣固邦本者允屬於元良咨爾  
元子廣陵郡王純幼挺岐嶷長標恂淑佩詩禮之明訓稟  
忠孝之宏規居常保謙動必循道識達刑政器含溫文愛  
敬奉於君親仁德聞於兆庶神祇龜筮罔不協從是用命  
爾爲皇太子於戲惟我烈祖之有天下也功格於上帝祚  
流於無窮光續洪緒逮予十葉虔恭寅畏日慎一日付爾

以承祧之重勵爾以主鬯之勤以貞萬國之心以揚三善之德爾其尊師重傅親賢遠佞非道勿履非禮勿行對越天地之耿光丕承祖宗之休烈可不慎歟

皇太子即位冊文

維永貞元年歲次乙酉八月丁酉朔九日乙巳太上皇若曰咨爾皇太子純惟皇上帝降休於我家用集大命克綏厥猷惟后祇率大典茲惟艱哉朕承累聖休德膺守邦之重不蒙天佑降疾在躬上不能昭事郊丘祇見烈祖下不能臨視庶政保綏兆人是用命爾當位嗣統宜陟元后代

予憂勤今遣使檢校司徒平章事杜佑副使門下侍郎平章事杜黃裳持節冊命於戲爾有光大之德敷於萬邦爾有仁孝之誠刑於九族慈和寬簡克享天心元符不可以固違明命不可以不畏爾惟察納忠直子惠困窮咨於正言慎乃儉德臨庶官以敬哀庶獄以情允執其中無忝我祖宗之不訓

即位赦文

朕纂承天序嗣守鴻業以不敏不明託於萬國兆人之上永惟高祖太宗肇造區夏列聖休德洽於人心肆惟寡昧

膺受多福大懼不克負荷爲宗廟羞若涉大川罔知攸濟  
思與羣公卿士方伯連帥祇若不訓惟懷永圖內熙庶績  
外宏至化以弼予理臻於大中俾懷生之類各遂其性咸  
得自新導迎休和蕩滌瑕累可大赦天下自貞元二十一  
年二月二十四日昧爽已前大辟罪已下罪無輕重已發  
覺未發覺已結正未結正繫囚見徒常赦所不原者咸赦  
除之左降官量移近處如復資者任依常調赴選如有親  
故在上都任於所司陳狀便與處分別勅因責授降資正  
員官者亦與追改亡官失爵放歸不齒者量加收敘流人

放還僧尼道士移隸者罪人已亡歿家口未許歸者一切放歸如自情願住者勿抑令歸如先有勅云縱逢恩赦不在放還之限者及別勅安置者並宜放還其安置之人五品已上奏待進止左降官及流人亡歿有官者各還本官今日已前痕累禁錮及反逆緣坐一切並與洗滌應緣山陵制度及喪儀禮物博詢可否務遵禮度必誠必信副朕衷懷橋道置頓並以內庫錢充諸有費用先給工價仍以見錢更不折物不得輒令科配天下百姓應欠貞元二十一年二月三十日已前榷酒及兩稅錢物諸色逋懸一物

已上一切放免京畿諸縣應今年秋夏青苗錢並宜放免  
天下諸州府應須夫役車牛驢馬脚價之類並以兩稅錢  
自備不得別有科配仍並依兩稅元勅處分仍永爲常式  
不得擅有諸色權稅常貢外不得別進錢物金銀器皿奇  
文異錦雕文刻鏤之類若已發在路者並納左藏庫清淨  
者理國之本恭儉者修己之端朕臨御萬邦方宏此道苟  
可濟物予何愛焉官掖之中宜先省約其後官細人子弟  
音聲人等並宜放歸親族應緣官市並出正文帖仍依時  
價買賣不得侵擾百姓所緣官中要妳母並取食糧戶充

稅不得科配寺觀諸軍先擒吐蕃生口配在諸處者宜資  
給放還本國天下官吏應行鞭捶本罪不致死者假以責  
情致令殞斃每念致此良增惻然宜切加察訪内外文武  
見任及致仕官並諸道將士等賜爵加階賜勲有差二王  
三恪褒聖侯各與一子官大長公主嗣王等各與一子官  
及出身有差宗子中有才用者委宗正卿以名聞量才敘  
用皇五等已上親賜爵加階有差陪位者年十五已上並  
放出身武德已來配享功臣及張巡許遠南霽雲顏杲卿  
顏真卿等子孫中各與一人正員官故尚父子儀贈太師

晟太尉秀實子孫中各與一人正員五品官及諸州府長官及京常參官父見在未有官者並與五品致仕官及階父歿母存者與邑號父母亡歿量與追贈陝州元從寶應功臣興元元從奉天定難功臣賜爵勲有差亡歿者與追贈中書門下節度使東都留守度支鹽鐵等使京兆尹觀察招討等使及神策神威金吾六軍將軍大將軍英武威遠鎮國軍使隴右經略軍使節度留後各與一子官有差其神策神威六軍將軍大將軍英武軍等使並與加官神策神威六軍英武威遠營左右金吾及皇城將士及緣御



樓立仗將士等賜物及爵階有差應東宮官及侍讀侍書教授在正月二十六日已前者國初已來職掌行事及冊命官授顧命撰制詔及修冊文並寫制詔官等賜爵加階勲進改有差蕃客等共賜物一千八百七十匹義武軍節度使下官健在城立仗共賜物三千八百四十五匹立仗將士等量加改轉內侍省及內坊宮正諸道進奏院及奏事官賜爵階勲有差內外五品已上文官及臺省常參官宜至四考滿與改轉中外遞遷量才敘用其中政績尤異須甄升者不在此限常參官及諸州刺史有先得替及假

百日經喪去官未授官者並即與進擬百司及在城諸司  
息利本錢徵放多年積成深弊內外官科錢職田等厚薄  
不均兩稅及諸色權稅錢物重輕須有損益並宜委中書  
門下與逐司商量具利害條件以聞不得擅有閉糶禁錢  
務令通濟諸色人中有才識兼茂明於體用者經術精深  
可爲師法者達於吏理可使從政者宜委常參官各舉所  
知其在外者長吏宜精加訪擇具以名聞仍優禮發遣朕  
當詢事考言審其才實如無人論薦者即任自詣闕應內  
外官及諸色人任上封事極言時政得失有可觀者別當

甄獎百姓九十已上版授及賜各有差仍令官吏就家存  
問順孫孝子義夫節婦旌表門閭重加優恤